

آخان بولود...

حسرتلری صایا - صایا

نغمه م دؤنوب دور هارایا

منی چکیرسن هارایا

دنیز گلینی سارایا

آخان بولود! آخان بولود!

چنلی داغلار آرخاسینا

دنیزلر چایلار یاسینا

شفقین قان دریاسینا

ایتن آنام لایلا سینا

آخان بولود! آخان بولود!

افق لری یارا - یارا

آپاراجاق اوزاق لارا -

اؤز قوینوندا منی یارا

بختیم کیمی باغری قارا،

آخان بولود! آخان بولود!

یالقیز اوچان قاغایی یام

صوندا دریالار پاییی یام

منده دالغالار تایی یام

اٹل لریمین هارایی یام

آخان بولود! آخان بولود!

قومسالارا یاغیش اولدوم
دوداقلاردا قارغیش اولدوم
اولدوزلارا تانیش اولدوم
سئوگی اولدوم باریش اولدوم
آخان بولود! آخان بولود!

من سیزسه مده سیزلی قالیم
طوز اولسامدا ایزلی قالیم
قوجاغیندا گیزلی قالیم
هارداسام تبریزلی قالیم
آخان بولود! آخان بولود!

قیش - ۱۳۷۱ تهران